



5449 /
~~PL 5531~~ / 1944

6

12





漑堂詞序

予聞孫豹人先生名久矣每讀其詩想見其人意謂身長八尺聲如洪鐘鬚眉皓白衣冠甚偉者必是人也今冬偶客揚州先生來訪予甫入門望見卽躍起曰噫此孫先生也吾固識之相與握手大笑無何先生以漑堂詞一卷示予予讀之有飛揚跋扈之氣嶽崎歷落之思噌吰鏗鎔之音渾脫瀏灑之勢此先生本色也蓋先生家本秦川遭世亂流寓江都遂卜居焉每西風起遠望故鄉思與呼鷹屠狗者遊旣不可得乃沉埋于春江花月酒旗歌扇間田無負郭環堵蕭然左對孺人右抱稚子相樂也已而相泣中若有不自得者故遇不如意之



事則以慷慨悲歌發之見無奈何之人則以嘻笑怒罵
遣之詞雖一技擬之草堂其在辛蘓間乎夫蘓公以殿
閣奇才屏棄蠻烟瘴雨之外惟與老僧談禪或強聞人
說辛公當南渡時自恨抱負未盡至欲據牛頭之山
決西湖之水陳同甫駭而遁去彼兩公者何如人哉其
見于詞者如大江東去浪淘盡千古風流人物與把吳
鈎看了欄杆拍遍無人會登臨意略見一斑矣今孫先
生庶幾似之顧先生老矣雖元龍湖海豪氣未除而亦
有時寄托閒情作兒女語者猶之東坡令朝雲唱花褪
殘紅稼軒倩盈盈翠袖拭英雄淚老子于此興復不淺
也其清平樂云小妾不嗔白髮先生並坐朱簾此一幅

行樂圖也世有未識先生者讀其詞如見其人孫郎在
焉呼之或出矣

康熙丁巳仲冬長洲同學弟尤侗題于廣陵旅次

溉堂詩餘目錄

卷之一

小令

夢江南 清平樂 瑞鷓鴣 三首 採桑子 二首 如

夢令 浣溪沙 七首 鷓鴣天 二十首 長相思 五首

柳梢青 生查子 點絳脣 好事近 五首 秦樓

月 二首 小重山 二首 朝中措 少年遊 二首 西江

月 三首 鵲橋仙 二首 調笑令 憶王孫 二首 減字

木蘭花 八首 踏莎行 十首 南鄉子 五首 醉落魄 二

首 南柯子 三首 菩薩蠻 十一首 玉樓春 浪淘沙

令 二首

中調

一剪梅 七首 臨江僊 二首 殢人嬌 行香子 三首

漁家傲 首 江城子 千秋歲 六首 定風波 天

仙子 二首 蝶戀花 意難忘 青玉案 洞仙歌

卷之二

長調

滿江紅 六首 沁園春 十三首 念奴嬌 四首 水調歌

頭 二首 綺羅香 燭影搖紅 漢宮春 木蘭花

慢 瀟湘逢故人慢 賀新郎 十首 瑞鶴仙 風

流子 滿庭芳 二首 水龍吟 過秦樓 醉蓬萊

法曲獻仙音

漑堂詩餘卷之一

焦獲孫枝蔚豹人著

小令

夢江南

無限事細雨索天饒一片春心三月水夜來停漿只搖

搖坐久莫嫌勞 鄒程邨曰細雨索天饒本山谷楊柳索

思乃得其妙

清平樂 東亭春日寫懷

花時雨候贏得雙眉皺短嘆長吁人背後却怪人憐清

瘦 歸來甕酒初甜堂前桃柳相兼小妾不嗔白髮先

生並坐朱簾

瑞鷓鴣

查伊璜宅觀女劇

終朝兒女伴英雄元末廉夫事偶同
火鳳身邊青海駿
牡丹花裏白頭翁
臨歌誰怕周郎顧
欲臥除非杜甫
龔門口雖知明月好
客心惟愛燭花紅

又

寓雲居寺思歸不得而作

賦詩終日對香烟若問安心却不然
赤手渾無長計策
青蛾似結短因緣
投林久在棲鴉後
乞食應居老衲

前孔子乘車穿鼠穴
吾今敢復怨皇天

辛稼軒詞仲尼去衛又之陳此

是乘車穿鼠穴

朝朝鐘鼓鬪清新
有客中間憶古人
石塔寺偏逢飯後
永禪師本是前身
既殊二子他年貴
難作千山古佛

隣當路肯憐行路苦
歸帆即日掛湖濱

採桑子

嘲佑客

春風古渡行人滿
來自何方終日奔忙
枉到青山綠水
旁
前頭歲月無多在
鬚髮如霜不肯還鄉
說着妻兒
淚數行

又

題焦山僧房

老僧頭白焦山頂
不管興亡安穩禪床
臥對江南古戰場
客來坐久渾無語
飯熟茶香歸路茫茫
水打空船
月照廊

鄧孝威日固自英爽有伯符當年氣槩○張虞山曰予廿年前登山賦詩臨江醜酒何其壯麗今讀頭白臥對句淒涼滿紙

如夢令

題礪磯孫夫人祠

劍戟生前森列巾幗鬚眉人傑萬里永安宮兩地行人
哽咽淒絕淒絕吳蜀今無分別

浣溪沙

寓豐城壽昌寺作

又見僧雛掩寺門愁聞鐘鼓動黃昏天寒難得被兒溫
不寐中宵明佛火無魚一月斷腥葷家書寫罷暗傷

魂

客裏寬愁篋裏書多時誰費醉工夫今朝况要一錢無
歸去好同兒子說老來欣與古人俱汝曹何忍廢三
餘

歲暮還逢雨雪天更無人到寺門邊卷中陶謝且周旋

前

居士辛勤誰可比老僧功課有時間木魚聲斷佛

寶劍詩成弔古餘蛟龍雲雨有時俱英雄豈料困長途

不見當年王季友人疑客是馬相如鸚裘典去忍寒

初

鄧孝威曰四首
讀來極是慘澹

又聞怨

已見秋風數雁歸玉郎消息至今稀江湖何處一帆飛

怕照嫁時明鏡子羞看耍處舊屏幃心煩剪壞寄郎

衣

鄧孝威曰心煩剪壞寄郎衣固是別出新意
○張虞山曰此詞在先生集中又是別調

不出羅幃上畫堂玉容消瘦自恹惶薰人一盞藥偏香

地任狂夫行駿馬天教怨妾老空房受誰恩重便爲

鄉

又 讀南史於檀道濟事有感

萬里長城百戰身
目光臨死尚驚人
他時空憶李將軍
宋文帝以道濟比李廣
傳胤可憐惟木雁
落毛誰肯與飢麟
一門千載為酸辛

鷓鴣天 乙巳初度三闕

弧矢懸門萬事休
堂中賀客醉仍留
命名當日如元亮
養子他年擬仲謀
今已矣復何求
長將淚眼望松楸
江湖漂泊朱顏改
老大空貽地下羞
膝下斑衣跪獻詞
老人微醉涕雙垂
難忘北海分梨日
最憶姜家共被時
兄與弟各天涯
那堪頭白又如斯

丹丘縱有長生藥
歲歲年年惱別離

張虞山曰如讀摩詰登高之作使人益重棠棣之情

多謝隣家老壽星
勸予斟酒誦丹經
既然面少封侯相
且可神遊不死庭
纔嫁女又添丁
窓中小婦尚娉婷
人間五嶽曾難到
何況蓬萊路杳冥

又 泊舟東溝步江村

十月江邊柳未衰
艤船先望酒家旗
白鷗飛過黃雞叫
正遇青裙縞袂兒
茅葢店板為屏
漁翁壁上挂蓑衣
村臨大道多行客
指點揚鞭與豎桅

又 夜夢

帆落寒雲瘦
日旁身無一事
轉淒涼
安排衾枕呼僮輩

變化憑他蝶與莊 鷄亂唱月微光
覺來猶自意倉皇 通宵惡夢牽纏劇
安穩何曾是睡鄉

又 虎溪道中

爲怕江深浪似驚 却尋山路避風波
相逢策蹇人無數 不信溪仍有虎過
身困頓路迤邐 翠禽閒殺老松窠
暫時畧歇聞鐘地 可有人家賣酒麼

炎熱難消七月初 看碑入寺動躊躇
白蓮一朵何曾見 綠竹千竿好作圖
塵面目老髭鬚 笑溪前面哭窮途
經年乞食依親戚 莫道陶公今日無

又 客中七夕

不寐因觀牛女星 腐儒心事也縱橫
叩門曾覺言詞拙

此巧如何乞得成 長寂寞久飄零
耳中何日喚嗶嗶 天孫有恨天知道
若說無私恐未能

又 客南昌觀入闈者感而賦

萬事吾今已白頭 槐花依舊照雙眸
蛟龍雲雨偏相左 滄海桑田大不侔
回首處帝王州 少年心肯慕巢由
可憐駿馬塵中老 只憶燕昭淚暗流

又 七夕書懷

瓜在盤中果在盆 癡男騃女總祈神
年年野老逢今夕 跳上匡床早閉門
長懶惰最清貧 眼中曾見海生塵
何時四巧根方斷 共戴吾家寶拙人

見孫樵乞巧對

又 詠硯

許結為隣野老家結隣視名因防塵污待籠紗多於絳縣人

年紀當去聲得青雲士齒牙 毛穎傳可同誇相若之面

畧堪嗟形容雖是端方甚生活惟嫌冷淡些

又 小史於席上出袖中鶴鶉戲弄不已季希韓命作詞贈之

一種天然意態真銷魂不待動歌唇手中何物心歡喜

此物云從樂府聞 時顧盼頗慙與他緣分恁般親

淵明曾玷閒情賦笑客公然願化鶉

季希韓日和學士詞却愛燠香小鴨羨他長在屏幃已有先於願化鶉者矣

白月紅燈小翅明關心飲啄賴多情袖中出入同歌扇

扇會生風不會鳴 年最弱體偏輕更誰能敵汝音聲

登場也作鶴鶉勢未肯輕輸定得贏

又 飲王金鉉明府署中遇儉父入席醉而罵坐明日賦此呈金鉉

屈指飄零歲月深胸中五嶽失崎嶇逢人啼笑如猩猩

任客烹燒到鶴琴 遭罵坐畧沉吟屠隆昔亦類吾今

孛星入度真難料益使吾徒重賞音屠長卿與馮開之書昨過從足下甚

喜乃不幸遭儉父作灌仲孺使酒罵坐令人意邑邑不歡顧安得與足下據胡床談處又安得長策揮俗客于門令吾兩人勿傷雅道也嗟嗟人奈何能無此遭哉太史占僕夜來流孛入度足下豈亦有是耶

又 題汪季角舍人小像二闕有序

圖中主人獨坐高閣中復有美人于桐下抱錦瑟而立蓋季角名其讀書之閣曰百尺梧桐閣又名其所作詩餘曰錦瑟詞遇善畫者禹生因為作此圖也

看汝丰姿豈酒狂少年能賦擬長楊閒中偶愛花間集

會撰歌詞錦瑟旁 桐百尺恰朝陽影移層閣坐相當

揮毫才子何殊鳳抱瑟佳人卽是凰

傑閣崔嵬勢若飛尋常俗物到門稀乍疑太乙燃藜處

欲認湘靈鼓瑟歸行樂耳莫相譏婦人醇酒豈全非

承恩更上絲綸閣却別梧桐看紫薇

又題徐原一翰林小像

玉署深嚴令聞馳珠庭犀角好丰姿見山樓下相逢處

余初識原一于汪季角舍人之愛園似共浮丘掛袂時蕉靜對卷長披

從今更語虎頭知一門鼎甲朝中少補寫荆花爛熳枝

又題蔡九霞小像

彩筆曾將氣象干布衫芒屨着何年自言彌勒同龕坐

更勝無懷與葛天顏沃若意悠然餘生惟願老林泉

其如狗監知名姓新奏凌雲殿陛前

又壽家無言

後汝爲人尙七年飄零一樣在江邊也知妬忌非男子

妬殺盈頭髮恁立婚與宦不相關何須更要住深山

塵中自有延齡術請學吾兄也獨眠

鄧孝威曰獨眠是梓菴秘訣他人學不得

應接雖煩意自勤容顏非故興逾新平生不解藏人善

名下人人愛老人橋上月甕中春當筵何可少歌唇

近來能作花間語誰似山東妙絕倫無言新刻十家詩餘山東謂西樵貽

上兄弟與無言最善

長相思

愛潛夫勝狂夫騷雅場中調不孤多時相見疎 路模
糊淚模糊愁過黃公舊酒壚斯人今已無

叩天門天無言直木誰教伐却根不如春草蕃 便長
存已傷魂卷裏哀吟似峽猿飄零惟酒尊

惡風吹雲何之者舊凋零忽若斯老人心更悲 天難
知善難為伯道如何未有兒藏書今付誰

長相思長相思不道如今長不歸更尋相贈詩 長相
思長相思今日相思是了期明朝還憶誰

恨悠悠夢悠悠滿腹文章一土丘魂仍招得不 玉為
樓月初修王李多時在上頭誰今第一流

玉海詩中錢牧齋列朝詩選錄其語作小序至謂上帝
不違世好則已甚矣○鄧孝威日爾止詩晚年多頽唐

放筆僕曾于宋澄嵐李叔則兩先生座間直言之然
詩樸老處正復不少行當與澗堂共選而行之○四
可謂極其悲痛友朋之情于是乎為至矣○張真山曰
余哭爾止于塗山草堂讀降卦詩嘆其為鬼尚具至性
退而作詩弔之愧不成章
澗堂五詞不啻山陽之笛

桺梢青 舟中書事效辛稼軒八難辭

常在家難江深千尺遇順風難老徒飯難杜康不死能
解憂難 買山錢到手難要野老同談笑難醫俗病難
君休妄說古與今難

生查子 不寐

月下小窓西燈燼三更後幸是不成眠惡夢尋常有
本愛挪為腰莫使蓬如首憔悴鏡中人值得相思否

點絳脣 魯園看桃花

疑入秦源又疑采藥天台裡赤城霞起洞口逢仙子

短竹籬邊春漲官河水還堪喜間梨偏美更雜房陵李

張正見賦間真定之
蒼梨雜房陵之標李

好事近 題韓醉白小像

作達不曾遲雙眼懶施青白但向醉鄉深處養少年顏

色 雙龍會合定何年長劍過三尺世上幾人知我許

紅裙相識

又冬至

日短為愁長長短全無定理守得窓兒黑了要燈花傳

喜 驚心葭瑄又飛灰日更長如此妬殺江邊梅柳漸

抽枝含藥

明日更堪愁何物與愁堪比身在天涯異縣對長江千

里 閨中果否線曾添多恐慵針指因看天心回轉怪

郎何為爾

又 舟行入燕經過淮陰重訪家涵中

咫尺易相尋何況弟兄垂老別後最驚心處見兩回秋

草 上堂一揖又登舟身只似飛鳥所喜音書易達是

長安大道

宴會荷淹留燈火去年時節小弟一時狂態類西湖老

鐵 飢驅今日入長安堪此遠離別慚愧淮陰釣者本

漢朝人傑 張虞山曰二詞
爽快如食哀梨

秦樓月 客京中二首

奇如此先生也入長安市長安市人情不重布袍芒履

西風吹綻黃花藥黃花與我同無耻同無耻朱門相

見何如栗里鄧孝威曰遊戲得妙然非灑堂先生不能

人多怪之常欲賦詩自朝今讀此詞不覺噴飯

情誰訴青衫破帽恹惶路恹惶路荆高已死吾年垂暮

西山聞是登臨處何人天壽山中去山中去十三陵

寢淒涼烟樹鄧孝威曰僕近題友人昌平詩有句云未尋天壽路空哭戰場春與灑堂同此情也

小重山迎春客東光

聞道東皇駕出遊先過潘岳縣賞風流雖無梅柳有來

牟論風俗此地少歌樓何事久淹留芒神應笑客愧

春牛老思村舍見無絲歸期遠荒草滿田疇

又凌聖調年十七午離江都慈憐入京就婚花燭之夕為賦此詞

孔雀屏風列畫圖香添宮裏餅繞流蘓新人意內費躊

躇郎家好得似妾家無郎也費躊躇瓊花驚乍見似

江都上堂何日拜賢姑知今夜花燭眼模糊

鄧孝威曰花燭詞無此雅正之音諷以歸拜賢姑具見古道

朝中措平山堂懷古和歐陽公原韻

平山人昔對晴空得句酒杯中依舊荷花開了人今化

作飄風山堂久廢風流如見萬古情鍾何必曾遊門

下方思太守僊翁

少年遊題魯紫漪小像圖中主人袖劍旁有俠客三人艷妾一人同立霜葉樹下似與之談

劍術者

園林佳處手曾携紅葉正如斯新來賓客鷹揚虎視借
問是伊誰 自從烽火驚雙眼笑迂腐只吟詩出袖銛
鋒能藏腦後羣俠讓蛾眉用聶隱娘事

尋常相見輒論文心事也曾聞賣豶屠狗無非我輩耻
入腐儒羣 非關年少須行樂劍術愛紅裙銀液犀株

鎮忪防怯莫比畫中人李長吉惱公詩犀株防膽怯銀液鎮心松

西江月 題馬圖求孝廉小像

共愛鸞池筆墨誰欽龍臥丰姿壯懷先被虎頭知寫出

南陽藁子圖中羽扇綸巾 塵尾清談何益隱囊閒致非宜能

兼將相是男兒肯只驕人青紫

又 早春雪夜飲王仔園小輞川卽席限次朱希真韻

花是宵來火樹雪仍冬去寒雲古人誰可作同心梁苑

鄒枚自命 家慶能偕故舊萊衣着意鮮新開樽知道

爲娛親白髮公然坐定

二 又次黃山谷遇宴集獨醒韻

王績從來好飲謂仔園尊公天葉 陳遵未必能過平生怯見酒

如波任把東坡嘲我 後閣不教客走前門更被童攔

淹留每到漏將殘樹上棲鴉早散東坡詩淺量已愁當酒怯

鵲橋仙 閏七夕集飲王天葉宜樓

忙哉烏鵲頭毛再禿知汝雖勞不怨人間離別那能無

重引起愁條哀蔓 姮娥依舊廣寒孤處上聲忍不持杯

相勸書生老矣學忘情任河水頻翻波瀾

十家兒女兩番瓜果拙尺何曾巧寸從來巧莫過詩人
得句處香清茶嫩 酒星重會文星無恙萬里乘槎休
論歡娛無那閨更難也只似雙星多恨

調笑令

張紅橋

張家有女號紅橋工吟柳絮待桃天傾城但願配名
士東隣年少魂空消林生句好王生妬姻緣易盡金
陵去情長命短小樓寒遺詩泉下重相遇

相遇因佳句年少東隣枉相妬春鴻遠向天邊去獨對
紅橋烟樹情長命短人何處寂寂泉臺無語

憶王孫

題劉六皆舍人小像圖中美人手折蘭花一枝六皆
正襟危坐手持書卷意殊不相顧盼又有侍兒抱琴
囊立於側六皆同年汪蛟門爲作減字木蘭
花詞頗涉嘲諷予特反其意作憶王孫二闕

拈花人不讓芳蘭相對終朝手一編看作風流恐誤看
賞音難琴在囊中久不彈

侍兒應怪主人迂樂事從來只讀書辜負蘭香噴鼻初
惹軒渠不信鴛鴦勝蠹魚

附汪蛟門詞

飲醇近色不信劉郎腸似石雙眼模糊左顧柔奴右
念奴 荒淫甚矣詩卷而今須閣起何事沉吟半爲
琴心與蕙心

減字木蘭花 客懷

逢春江上只道春愁難釋放又渡黃河若問離家兩月
多登樓何益一片閒雲頭上白無賴山光秋色如今
也斷腸

又看雲濤戲筋斗

妖姿無那移向掌中嫌掌大叠鼓相催收拾紅巾換繡
鞋亂翻筋斗不辨佳人身與手翔鳳驚鸞下得場來
仔細看

又贈山西妓

昭君村裏當日題詩傳子美何地無才一朵紅蓮山後
開能歌善舞借問芳年纔十五門少垂楊却勝楓橋
遇秦娘

又寄雲濤

歌喉舞態寒夜能留春色在更是情長曾送狂夫上太
行劉郎老矣重到天台應不似白髮雖然若問心情
勝少年

歡娛難買破費千金吾不悔只惜囊空又別鴛衾雨雪
中看卿體態合與詩人長作對肯嫁寒儒同守匡床
竹火爐

王幼華曰聲調豈減淮海恨雲濤非長沙之比則
以遇合有幸不幸耳無錢好色甚矣其無聊也

又久旱

慳雲吝雨似學人間商與賈天豈長貧又似艱難辦稅
人鞭龍不起誰借太湖三尺水渴夢難詳一口真堪

吸老龐

晴天雨下苦淚千村同日瀉滄海塵飛一帶荒涼舊釣磯
流亡無數租吏空回官長怒兒比翁賢戲學鞭笞
却偶然

又飲戴堯聲齋中

逢君便醉客路飄零都不記且復狂歌白髮其如壯士
何 杯闌燭燼嘹唳雁聲窗外進夜已三更橋上吹簫
對月明

踏莎行

陳其年贈王西樵司勳詞有云才子為官休亦好弟
當荷篠兄携杖西樵深佩其語蕭尺木因為作圖西
樵屬予
題之

磨蝎宮中南柯郡裏才名官爵渾如此歸來那用雒陽
田秋風又報鱸魚美 陽羨詩人蕪陰畫史他時相見
應狂喜古來林下少人行急流勇退先生耳
璩瑒齊肩機雲並齒烏衣甲第烟霄裏新詩多半詠田
園一門高趣誰能比 官舍聯床家書數紙驚心聚散
十年矣高人出處畧相同出山常是無錢使

又題家涵中小像五幅
東湖垂釣圖

脚底波清眼中天碧平生懶入王侯宅菰蒲深處便開
懷釣竿何必長千尺 自笑吾身乾坤跼踖飄零已是
頭全白不知范蠡肯相憐許為蝦菜船中客

又飲酒讀騷圖

太白風流靈均著作兩賢萬古雞羣鶴餘人碌碌耻相
師尋嘗自怪吾輕薄 手把離騷口啣杯杓何妨任意
成哀樂輕將此事讓吾兄誰知小弟心中忤

又 台山遠望圖

若問先生公和苗裔辭鄉久築淮南第小山桂樹儘怡
情回頭只愛台山翠 曹霸丹青有人能繼解衣兼識
蕭然意生綃寫出老龍身與君髣髴色青無異

鄧孝威曰結句是李長吉錦囊中語

又 虎溪濯足圖

故里難忘虎溪風景垂楊綠覆春塘靜澄瀾不比濁滄
浪何妨詠史詞同警 左思詠史濯足萬里流 高士從來愛身及

脛紅塵深處看如奔不曾失脚踏橫流誰言濯足污清
冷

又 鐵杖芒鞋圖

鐵杖芒鞋高尋福地塵中那得人同志青山到處可容
身鏡湖不要君王賜 遶膝熊羆盈窓蘭蕙何曾婚嫁
傷高致向平只是可憐人相逢豈肯兄相事 時予方爲次兒謀娶

婦○張虞山曰結處忽自說心事便覺風格跌宕

又

拙鸚鵡爲主人所惡大風寒無人肯爲移架煖處鵝
益默默就死而已予憫焉偶讀李空同李氏大傳至
吏隱公爲訓導時上提學御史閻禹錫書中謂此鳥
不籠縲之不完轉相道假以歲年卽鮮有能語者以
喻已變俗之難及閻責劾之非旣深賞其言得先王
造士之法而又哀拙鵝之窮非其罪也作二詞呈主

冠玉徒然中無有也綠裳朱喙空閒雅誰知却似息夫
人不言不語精神寡 終日回頭隴山鄉野禽中蓋是

傷心者滿天風雪正愁人如何忍置寒簷下 鄧孝威曰仁者之言

客至呼茶猫來喚打只須兩句何其啞無人宛轉導聰

明工夫肯似教歌者 我既飄零汝非瀟灑拙人拙鳥

情牽惹上書思學李先生疾呵凍硯書窓下

張虞山曰鸚鵡二詞似讀老杜詠物詩

又為揚州太守金長真禱雨有應而作

叔度初來萬家安堵如何早魁翻相侮看公自是泰山
雲隨身到處豐年雨 自笑愚農久離鄉土出疆舍未

愁兒女此生不想雒陽田但聞米賤私歌舞

南鄉子 途中

南客復西行遊興何時倦長卿那有諸侯真好事相迎
道旁堠子獨多情 千里火雲明撲面塵沙又一程此
去太行山下路尋兄牧羊慚愧說初平

又

曉起揭簾兒不怕寒風面上吹故故回身懷抱裏嬌癡
懶整新粧對鏡遲 巧語賽黃鸝笑我頭如白鷺鷥四
十八翁休笑老情知老在逢君二八時

張虞山曰四十八翁二語與不見盧郎年少時皆巧于自嘲

又賦送無言令子魯三之汝寧

淮堂詩集 卷之一
隋苑柳青青身著班衣勸醪醕負米歸來曾幾日消停
依舊騎驢向汝寧 書寄竹西亭多少愁心對鶴鴿入
夜他鄉應得夢趨庭仰看天邊有壽星

又見客爲債家所迫而作

催促奈君何紙上光陰急似梭却愛草鞋名不借知麼
到處逍遙得似他 忍餓且高歌省得相逢有怒訶說
到向平婚嫁事蹉跎我亦人間負債多

董樗亭曰祝京兆
不得專美於前

山重恐難馱累債如山力幾多縱有馮生能市義差訛
不遇田文却奈何 君自惹愁魔唾面須乾莫怪他也
覺尋嘗行處有叵羅今後相纏莫恁麼

汪季月曰趙嘏獻李僕射詩有新諾似山無力負之
句曾見啞於葛常之山重恐難馱二句精切便非趙
倚樓
可比

醉落魄 離揚州十四弟實夫初從故鄉來

孤舟初發回頭更望隋宮闕客心此際愁難說似渡桑
乾却與并州別 遠來吾弟謀生拙聯床夜雨聽纔歇
出門自笑腸如鐵懶答妻兒問我歸時節

又日暮

眼花如霧關山回首天將暮寒鴉啼亂江邊樹一點青
山今夜停舟處 淒涼半晌人無語前途明日逢親故
錦城雖樂留難住寄語江豚莫阻歸時路

南柯子 望江邊村舍

多識愁邊路長回夢裏家不知身老有誰嗟但見他舟
蓬尾最欹斜 霜打青楓樹風吹白葦花村連山口竹
交加可羨居人賣酒作生涯

鄧孝威曰頻年作客羨江頭賣酒翁真是天上然宦海浮沉更有甚于作客者

又滕王閣石亭寺閣並俯臨章江感而有作

富貴當時事文章萬古名滕王高閣最崢嶸却賴王韓
筆墨動公卿 齊景雖千駟夷齊獨有稱須知今古此
人情誰道韋丹不抵李元嬰

又冬上日憶兒

城外江波綠城中橘柚黃今年至日好晴光只訝催人
節序往來忙 愛日兒知否趨庭事久荒也應愁與線

同長愁我老來多病在他鄉張虞山曰老病他鄉一語不忍讀

菩薩蠻 歲暮題書尾寄揚州

裁書遠報蕪城裏歸舟更待桃花水無事且觀梅梅殘
桃即開 自從書信斷只道郎將返讀了恨燈花欺儂
也似他鄧孝威曰恨燈花還是第

強將樂事從頭勸窓前不用長嗟怨大婦善持家焚香
且煮茶 兒啼聲自好停繡當窓抱掌上看明珠應憐
老蚌愚

誰因煖老思燕玉天寒遠慮腰如束相累是長貧衣單
風雪晨 一金聊附寄識我憂勞意且莫贖琴書葡萄
絢典無

腰肢久別春天柳近來眠食能佳否遠處正多疑休教
回信遲 因郎休更悶膏沐須親近嬌女意堪矜新粧
學母能 鄧孝威曰遠處二句細膩之極

又 賦雪中寶珠山茶

天寒轉覺花兒美畫中好景應無此雪舞滿簷風赤城
霞更紅 將花持獻佛可是僧家物色自勝珊瑚人言
是寶珠

採桑曾是羅敷女不妨畧帶村中趣艷絕兩株花不妨
名喚茶 賞花須對酒難與龍團友又似黨家姬淺斟

低唱時 張虞山曰詠物能手

又 僧舍夜聞雨聲

夜闌時候瀟瀟雨僧床不寐聞飢鼠猶勝泊江邊浪聲
來打船 客心容易碎風雨應無罪歸路幾時聽憑教
滴到明 張虞山曰罪風雨奇矣應無罪更奇董樗亭曰猶勝泊江邊二語非老于羈旅者不能道
豐城雨是江都雪那邊天氣冬無熱兒女夜圍爐遙憐
客舍孤 憐多疑不少何故歸期杳到處有迷樓能教
客不愁

又 憶故鄉棗

多年不見隣家棗眼中吾婦今偕老憶昔對秋盤客來
備整冠 歸鄉空有意獻壽非吾事閒且錄函詩赤心
投向誰

又 黃天濤見示琴怨詩及其亡姬陸小雲詠花十絕次宗定九韻二闕書卷後

樓頭忽聽琴聲起曲中哀怨非流水莫怪懶看花同誰
倚碧紗 損眠非一節句句心頭血長吉作嬌娘難求
人命長

樓頭終日吟聲起傾城名士魚和水解語一枝花香風
透帳紗 依然逢令節不見裙如血亦不少蟲娘徒誇
諸技長 蟲娘見柵者
卿樂章集

玉樓春

卽事贈汪叔定

朱樓中有如花女絕世傾城心自許愛依宮樣作新粧
多少村姑曾笑汝 驚看百兩神仙府誰道佳期常間
阻手中針線恐難疎天上衣裳聞待補

浪淘沙令

白鶴觀道士問予生產答以二詞

謫世已多年尚記前緣嫦娥宮裡桂初鮮不合手中搵
快斧斫入花間 滄海正滔天不買桑田如今方悔手
無錢若見雙成羣玉畔調戲依然

陳其年曰使雙成見之得母却扇擲
揄此老日久不相見乃童心猶昔邪

家世愛文章非賈非商兄今出仕未還鄉我是金華山
上客叱石成羊 辛苦笑牛郎何似文昌久傳王母鬢
如霜怪底吾身容易老人喚東方

中調

一剪梅 閒居

門前只繫釣魚航花滿春江月滿春江歸來樂事一椿
椿大婦東窓小婦西窓 閒看刺繡對銀缸鶯也成雙

蝶也成雙笑他蘓季苦奔忙今日秦邦明日燕邦

張虞山曰寫兒女情時有老氣自是先生本色

又 閨怨

當時樓上共看花鏡拭菱花笛落梅花人同秋燕暫辭
家燕已還家人不還家 到頭夫婦總如花輕薄桃花
寂寞梨花知郎終歲在誰家黃四娘家吳二娘家

又 飲季希韓家

頻年相隔在天涯未見堪嗟見了堪嗟高才猶自困泥
沙富者誰耶貴者誰耶 三更深坐月初華樹影窸
人影窸紗每愁腸窄量些些飽死君家醉死君家

又 贈希韓

題詩欲贈費沉吟敬汝從今惜汝從今自言深悔着
衿山有清音水有清音 文如珠玉竟誰欽重似胡琴
輕似胡琴雖貧仍見古人心一擲千金一諾千金

又 寄懷吳賓賢汪舟次

男兒無命蚤封侯飢鳳啾啾餓虎垂頭公卿何物眼中
稠不學堪羞裾馬襟牛 歸尋二妙且同遊蔣徑須修
好待羊求無錢買酒漫憂愁與老妻謀且典鸛裘

又 酬暴恭人贈別詞用來韵兼告以古今作者用心之異敬答虛懷敢辭多言

蘓公昔日守徐州梁子清修千里從遊吾兄謂汝與梁
侔莫上黃樓却望屯留 如予何足助勤修有問難休
奈賈長頭別期將告淚先流老病窮愁後會何繇

淮寧言集 卷之一
雕蟲豈敢論千秋遣興驅愁伎倆徒優明師須向古人
求宋玉風流蘓李同遊杜詩風流儒雅亦吾師又云李陵蘓武是吾師漫逢
花月費雕鏤六代齊休靡靡堪羞須知此事有源頭其
見河流誰見牽牛

臨江僊 送王金鉉之越中

春到揚州人又去獨看東閣梅花高樓何處弄琵琶不
知吾意懶空自鬪繁華 帶雨早潮何太急望中離恨
無涯孤舟明日聽啼鴉多情江上客不獨爲思家

又 五日壽王天葉

此日結蘆採艾當時降甫生申公然鶴壽異雞羣獨醒
非屈子好客是田文 續命不須金縷浴身何用蘭盆

多年厭對石榴裙老人尋白社兒輩上青雲

鄧孝威曰字
字確切天葉

又 周伯符七十書贈

莫怪此翁貧且老風流依舊多情古來門第最崢嶸吹
簫扶漢祖顧曲駭吳伶 慚愧吾衰今甚矣餘人半已
凋零回頭漫悔事無成酒徒常快意狎客也傳名

帶入嬌 喜沈姬生子

老蚌生珠昨夜光明環堵喜歡煞垂綸漁父三朝豹子
便食牛如虎還自笑難忘西施兩乳河鮑有西施乳 女作門
楣男持門戶復何用狂夫作主向予相勸莫奔馳塵土
問教法力田明經博古

行香子

江舟使風作

順逆循環風也難閒怪吾生衣食偏慳棲棲何往吳楚
 之間嘆鬢如霜舟如葉浪如山 家住邗關鏡有雲鬢
 問歸期淚眼潛潛青春無幾悞却紅顏笑容何為不如
 身倦知還

王幼華曰氣槩語終是英雄本色
 舟山以雄壯為次未可深信也

又 詠燈下水仙花

姑射冰肌似是還非費躊躇夜靜香飛燈前細認髣髴
 湘妃見眉兒翠裙兒綠水邊歸 額黃堪愛却勝宮闈
 長精神書屋燈輝十分淡蕩別樣芳菲正酒兒清茶兒
 嫩好相依

張虞山曰恰是水
 仙他花那借不去

為愛仙丰欲畫屏風奈丹青不及天工惟應夜夜秉燭

呼童看形兒縈影兒淨勝圖中 清琴一操曾記相
 怪燈花似識情悰居然含笑慙懃報喜報各神降無妖
 態少凡容

漁家傲

本意

八尺魚舸輕似簌翁歌款乃兒能和山角漸看風浪大
 歸去那柳花春店樓頭坐 醉即還來船上臥不知明
 月何時過師友平生無幾箇巖共我風吹雨打羊裘破
 白葦黃茅風肅肅打魚人在村中宿新婦開門紅日旭
 呼小叔弟當晒網兄持竹 水何淡蕩山重複誰家借
 染屏風綠笑看飛塵粘馬足豈無屋先生但向窮途哭
 籬落蕭條惟種竹漁翁見客談心由于世無求衣食足

儂不服任公子輩中多欲
收罷蘆花裝作褥生兒跪
向船頭祝不願三閭才滿腹
高大屋中間多少人奴僕

張虞山曰胸襟眼界高人一等先生借漁家自道
董樵亭曰從來賦漁家傲者無此新聲變調

又題徐電發楓江漁父圖

楓葉黃時天似水圖書堆滿船
倉裏不共諸侯分邑里
吾欲擬筆床茶竈天隨子
辟世江湖非得已干戈爭
鬪何時止釣得玉璜心自喜
時至矣擲竿早為蒼生起
何日新投漁父社題橋才大如司馬
眉目偶逢高手寫
塵俗寡細看丰度真閒雅
不得一魚何謂也智謀肯
出任公下笠子遮頭憑雨灑
無苟且奴顏婢膝先生罵

江城子 賦錢戲為既恨復憶之語

孔方畢竟與誰親謂他昆不曾聞
餬口如予手足恐難
論看汝輕如榆莢樣通幾字也稱文
夜來春雨報詩
人綠苔痕滿衡門酒興來時無計免
空樽安得青蚨賢
子母飛不遠去仍存

鄧孝威曰世間恁風雅事無錢做不得
奈何以孔方忽之親之如兄固為不錯
千秋歲 題陳元水小像圖中手携二子

江湖伴侶曾向樽前遇
年老日憐童孺如來親抱送
孔子還相顧看膝下而今又倍徐卿數
文選精如杜莫
為傳經慮從此後高門戶携臨青玉索引上青雲路
誰可比將雛鳳在梧桐樹
髮今垂素莫只歌行路寬買宅多栽樹
勤書長統論更

賣相如賦錢到手酒家不可都持去 海內爭相慕車
馬朝朝駐兒問姓曾無誤敢題凡鳥字能荅楊梅語方
信道滿籬何用金如許

又 七友吳爾世母胡太君七十

稱觴酌兕文字爭新綺誰有當都非是愛河刀可斷古
井波難起巾幗內東門吳與蒙莊子 漸欲添兒齒且
為含飴喜桐與竹孫枝美曾參今不返李密猶堪倚論
毋德綿綿瓜瓞其宜耳

又 閔太母熊氏百歲

生當隆慶上壽齊潘鄭隆萬時新安有潘鄭母同百歲風俗美禎祥
盛黃山靈所聚婺女光相映堪詫事麻姑王母持家政

買宅依名勝懶和嚴張詠嚴休復張籍聞唐昌觀見有仙人來遊悵然賦詩

眼見仙姿靜行嗔華頂杖視惡西洋鏡應一笑何須李

密依為命張虞山日行 嗔二語奇創

又 上巳韓醉白生日先予賦者五人韓有荅詞

平生嗜潔墮地逢佳節流可盥蘭堪悅古來祥瑞盛名
士生辰別非然者文章何獨如水雪 史有張華說觴
愛義之設思往事真清絕何如蓬島客更唱千秋闋君
但喜樽前稍勝田文熱

巧鶯聲亂一帶秋千院斟壽酒多親串獨憐逢上巳不
侍華林宴天何意色如秦虢偏承眷 莫道男兒賤長
看他人面錢易得磨吾硯豈無金買賦亦有文酬絹須

痛飲流觴時節花千片

附跋 蘭亭修禊久為美談瓊觀稱觴復添新話蓋
韓子醉白頗擅詩名誕逢三日金賜束皙之時年少
八仙玉如宗之之美固宜勝友齊贈佳詞直如得綏
山之桃不止投衛國之李而已觀韓荅諸君詞益嘆
知之不盡能此不能彼免招放翁之譏善詞不善詩
始笑稼軒之拙惟予序齒最長和曲獨遲所謂珠玉
在前形穢增愧瓦礫在後淘汰何辭者也

定風波

無酒

每笑淵明止酒時留錢應是少延之誰料一壺賒未得
當厄吾今止矣更何疑 讀罷離騷風又雨無語古愁

新病倩誰醫莫怪酒龍常苦渴迂闊腰間從未佩金

天仙子

第二體

賀家無言舉次孫為友三長男

天上石麟誰易識載路何其聲似稷若言繩武武難繩
芝可食履堪織潛德幾人如祖德 次第孫枝名早立
箇箇才華驚郡國相逢他日老何為看筆墨須休息恐
被人猜詒厥力

二 賀友三

賀客朝朝來不止爾父久為名下士堂無錯寫弄麀人
祝詞美歌聲喜孝子於今生孝子 萬事看君真足矣

三鳳八龍從此始世間愚魯半公卿 東坡詩但願生兒
愚且魯無災無難

到公 青與紫常事耳早勸熟精文選理

蝶戀花

送王仔園之金陵

望裏風帆輕似鳥兩岸青山送客金陵道敏捷詩才誰
鬪巧剪江神手看三老歌舞南朝天易曉一霎君臣
一霎閒花草但把江山為畫藁勸君不用傷懷抱

鄧孝威曰南渡情事盡于一霎君臣二語不數潮打空城寂寞回也○張虞山曰一霎君臣一霎閒花草與多少興亡看過了且看湘裙六幅皆傷心語必傳無疑

意難忘

劉六皆舍人偶讀曹唐洞中贈荅詩適坐客有善丹青者因天台采藥是君家故事遂采詩中願得花間有人出不令仙犬吠劉郎二句命作圖并寫小像于此景之前自題曰采藥圖

采藥何年正東封議草西省催班花香蘭殿外鳥語鳳
池邊臨玉鏡惜朱顏朝罷忽凄然似白公心頭眼底詩

酒雙開

白樂天晚從省歸詩云入去丞郎非散秩歸來詩酒是閒人未云終是不如山下去心頭眼底

兩無塵

雲中吠犬聲傳比鵲橋成處却噪烏鴛淮王收
不得蕭史恐難前驚玉女出桃源相見話良緣問此來

汲書孰定漢史誰專

盧綸和常舍人詩汲書荀勗定漢史蔡邕專

青玉案

題劉六皆舍人小像自題曰傳經圖圖中天祿閣高人雲中下有二童子負書並立

君家自古家聲赫曾閣上繙書籍看爾傳經真上策宗
文宗武縱然不懶文選終何益雙僮清絕難訶責書
在肩頭意偏慳所喜門前無俗客牙籤滿架佳兒能讀
此福天應惜

洞仙歌

送汪季月中翰入京

夢中相見有神仙識字勸食菖蒲益人智待拍肩揖袖

踏遍湖山還私請玉笈瑤函相示 告余將別去駕鶴
飄然不管攀留墮清淚覺後費躊躇此夢何因却應在
故人汪季袖五色彩毫謁承明道雖草絲綸敢忘薜荔

曹顧菴曰盡棄應酬庸料此
法得之稼軒答壁竹山風蓮

澗堂詩餘卷之二

焦穫孫枝蔚豹人著

長調

滿江紅 偶題

憔悴江湖英雄老皇天知否笑半世婚兒嫁女歛錢鬻
狗五岳相看原不遠重華去我何其久漫矜誇壯氣若
虹霓常空手 澆塊壘無如酒惹禍害無如口况少年
一輩欺吾老醜詩賦合當加杖罪閒吟敢效張芸叟誓

從今燒却楚騷經尋王母

自註紹聖初以詩賦為元祐

令士庶傳習詩賦者杖一百畏謹者至不敢作詩時張
芸叟有詩云少年辛苦較垂魚晚歲雖垂耻壯夫自是
諸生猶習氣果然紫詔盡驅除酒間李杜皆投筆地下
班揚亦引車惟有少陵頑鈍叟靜中吟撚白髭鬚蓋芸

謂也

又題朱錫鬯處士小像錫鬯有歸耕之志因命戴葭湄為作煙雨荷鋤圖索予詞

管樂肩頭長卸却乾坤擔子怪造物從來顛倒英雄如此始覺敬通賤可玩只看簑笠身難比每遭逢烟雨偶然間功成矣 羞載贄寧操耒羞從獵寧于耜問先生門第云同栗里晉室勲臣司馬後祖孫出處各齊美錫鬯為太傅文恪公會孫想同行此路豈無人桃源裏

又前題

萬里曾遊塵撲滿東西南北却走向三家村裏披簑戴笠携手同行入最少北風雨雪催歸急訪椎牛屠狗昨豪賢無消息 這邊路黃狐立那邊樹玄猿泣愁獨行

踽踽如何去得餽肉君能麾道濟買山吾豈須千頃莫便言沮溺耦而耕今難及

又壽周聿田先生為星公翰林尊人

老眼偏明獨喜看家風萬石年少日名齊董相天人射策先生甲子榜舉人丹桂依然香滿路蒼松古絕高千尺把勲名早付與佳兒求閒適 雲為狗憑朝夕田為海憑今昔但長供把玩床頭有易綵袖深籠紅橘馥金樽滿酌黃鸞液笑蓬萊未必有蟠桃如顏色

又題宣州老兵荷戈遺像姜貞毅先生如農給諫自號宣州老兵

一代完人曾含笑輕投颺嘆往事朱雲折檻遭逢難兩宰相豈容林甫輩諫官須作龍逢黨笑當關虎豹亦

滄堂詩集 卷之二
何爲頭空仰 憑血濺彤廷仗 憑肉爛鸞臺長荷天王
明聖殷商之上陟岵嗟予誰忍讀執殳伯也猶堪做問
籠頭邊帽是何人黃門像

又

給諫姜如農先生易簣遺命必葬我宣州戍所
使我千秋無違君命作此詞輓之

三十年來常語客孤臣惟欠到今日敬亭山下如投客
店諫草萬言長不朽孝經一卷須同殮愛文山祠側骨
堪埋山光豔 殉塋物非鉛槧流涕處因弓劍記君恩
最重征衫可驗自祭陶潛曾竊比招魂宋玉誰無忝正
百端交集輓歌時過天塹

沁園春

戴務旃携具過寺寓

身久不歸節近重陽徘徊獨行正墻頭雨過豆花將落

殿前風起松鼠齊驚乞食題詩遣愁沽酒滿鏡誰憐白
髮生差堪慰有奇文在篋閒寫閒評 蒙君念我飄零
信海內公然有弟兄更米分仁祖飢腸頓飽螯携畢卓
左手同腥海已爲田橘還化枳往事回頭涕淚橫吾衰
矣願無雙國士努力躬耕

鄧孝威曰漑堂詞豪健如飢鷹獨
出此更細膩覺機軸殊爲不凡

又

調務旃重九前辭予歸家

我亦思家偶遇良朋且須留連念出門十步妻兒刺刺
結交四海裘馬翩翩誰是誰非誰優誰劣欲問惟愁座
客喧君微哂已畫成棋局寄到書箋 明朝便策歸鞭
想樓上裁書拜鏡前道鹿雖求友鳳常思配劍猶依匣

琴不離絃五日為期日之夕矣何用慙慙贈婦篇急歸
去正登高節近化石堪憐

鄧孝威曰柔情昵致纏結
筆端固是孫郎自為寫照

又詠香

好向珠樓應贈阿嬌鈿盒初盛是鬱金沉水兩般通意
都梁迭迭萬里馳名繡幔風吹紗窓雨過裊裊惟看寶
篆明難消受怕滿身花氣蛺蝶須驚 休嘲十索關情
便翠被慙慙到五更看季和相見下官欲走蘓州端坐
好句初成睡鴨爐中紫鳧屏下一縷公然價不輕這滋
味笑誰堪共賞茶嫩琴清

又偶興

閱世如何傳舍中間夢幻難知看西山兄弟搗薑餐杵

東山甥舅賭墅圍棋苦樂無常勲名何益往事吾今懶
問伊憑天命遣花飄糞土萍散清池 從今無事休悲
也無意還將酒盞持但破鐺石室枯如老衲埋盆汲水
戲學童兒若問吾鄉此心安處不比人間路險巇誰得
似把湖山賞徧筆墨淋漓

汪季舟曰
儼然蘓陸

又疊前韻

四海茫茫獨自歸來幾箇相知嘆廣寒宮裏昔曾操斧
爛柯山上今只觀棋到手樵翁回頭月匠巢與由兼呂
與伊還自幸勝人盲馬瞎夜半深池 從來樂極生悲
奈跌宕風流不自持請呼牛呼馬憑呼老子管山管水
畧管些兒海變為田田仍變海舉目平原即險巇且遊

戲甚泉分清濁酒辨醇漓

又作書寄兒是日偶讀莊子因用莊子語

一紙平安心事無窮誨汝諄諄看賣名天下取譏抱甕
讀書堂上見笑斲輪誤我多年何堪誤汝莫信文章能
致身裁書罷笑生兒恐似類厲之人虎狼何以稱仁
奈大道終難告子孫但授之以職多男何懼華封三祝
此語偏真去國離鄉見人而喜病裏看誰操藥勤須歸
去任糟糠相責辭粟安貧

列子辭鄭子陽粟

又遣愁

愁太欺吾語汝知之決絕從今汝虛如秦始城誇萬里
敵非王濬鎖恃千尋舊復生新長還續短年少能教白

髮侵交雖久奈一朝悔悟疾怨方深豈無山水清音
更靜夜閒彈綠綺琴見堦前萱草佳名可愛湖邊盧女
小字堪欽懶讀離騷惟觀齊物掃汝何須用帚臨愁誰
料正明明如月杲日當心

又愁不去

愁蒼先生幸不傷人老過相疑况寄予天上天傾久矣
埋予地下地陷多時肯學虞卿著書自見願立微勲報
故知從今往但喚憑江草敢不追隨重來聚會何時
是獨上高樓笛正吹看杜康一輩虛名無益張衡四咏
得力伊誰滿載扁舟君王不稅方識人間此貨奇君休
誤待人言皆爾我始如斯

汪蛟門曰愁復能言奇矣二詞可與昌黎送窮並傳

又題想園想想園圖有序

家新齋先生舉進士仕爲大理評事以清白傳家嘗
擬構一園久不就有友陳涉江侍御爲作想園圖蓋
彷彿文衡山神樓圖遺意也先生歿後令嗣坦夫追慕
先志更命爲想想園吳梅村祭酒宋荔裳觀察皆爲
文記之四方同人題詠最盛况予追隨喬梓唱和壘
篋實爲榮遇敢獨默焉爰賦沁園春二闋書之卷末
頗笑吾徒環堵蕭然此外何求只花生筆底堪名解語
草成枕上足號忘憂廣厦千間總容寒士何異香山萬
丈裘不知足更願逢酒帝封醉鄉侯 吾宗前輩風流
也臺榭惟從臥處遊縱官于南海越裝全少貴爲齊相

嬰宅長湫只似鷲籠還同蜃市五嶽胸襟小九州真奇
想論洗洋自恣復類莊周 題想園

又

俗尚繁華州號輕揚砥柱伊誰恨招魂何處悲深弟子
趨庭已矣痛絕佳兒我亦當年登龍之客共對丹青有
所思回頭處奈樓臺無地廉吏難爲 應同手澤看之
冀魂魄千秋尚戀斯昔馬家舊宅改題園額魏家舊宅
贖賜孫枝殷鑒非遙儉存奢失請讀前賢諷諭詩吾多
幸問誰曾畫裏兩世追隨 題想想園

鄧孝威日題虛詞實寫得
續紛錯落皆極珠玉之光

又 又次宗定九韻二闋

滄堂詩集 卷之二 九
齷齪人間達者觀之蝨處禪中况宛其死矣他人入室
鬼惟知愛茂栢深松百畝為園終身辛苦大抵移山事
畧同真堪哂是酒闌客散燕去樓空 先生退學明農
遇畫手相知點染工似李侯夢寐嘗遊天姥桃源宅舍
不傍秦宮託配仙人與俱遊戲此意還追屈子蹤披圖
罷悟不須錢買豈獨清風

又

孝子思親笑語難忘髣髴圖中看而今稽紹身如野鶴
當年陶令手撫孤松非路非途不阡不陌園與思光文
體同傳佳話須子虛亡是彩筆凌空 眼前如見黃農
更弓冶無慚譬百工笑延年宅宇依然如舊怕逢兒面

肯入兒宮汝善為之後人誦拙豈料他年狐兔蹤誰得

似却論成樂志詩詠家風張虞山曰幻事幻想非先生幻筆不能寫得盡情

又詠硯池李若士范廉夫索和

袞袞詞源其釣伊何玉作蟾蜍杜詩宮硯玉蟾蜍憶潘江陸海

名從此得怒猊渴驥勢必相須既有城池誰為將帥敢

忘義之筆陣圖筆陣圖云水硯者城池也心意者將軍也論恩澤最周旋措

大潤及枯魚 臨池何事躊躇笑用舍行藏爾與吾若

用為霖雨帝王之佐老於泉石賢聖之徒爾不言功吾

當表奏即墨侯封豈過歟池如泣正漢文求粟晁錯陳

書陳其年曰老氣橫九州讀書破萬卷方能作此

念奴嬌陪諸公宴集城北園林限屋韻坐有魚較

柳衰如此笑忙人城市終朝相逐畫裏烟波誰作主付
與雙鳧孤鶩選伎徵歌尋花載酒此是吾曹福風流前
輩揚州休讓杜牧 爲問螢苑雞臺繁華幾處但見青
山秃多少興亡看過了且看湘裙六幅年少飛揚輕衫
匹馬會射林中鹿老來腸斷如花人倚修竹

張虞山曰歌舞場中着無限感慨語非東坡稼軒不能下手 鄧孝威曰是時各流駢集亦復佳製如林讀至多少興亡二語不覺齊爲服拜不減孟襄陽微雲之吟劉賓客石頭之唱也

又 家無言思歸未得爲賦此詞次曹顧菴學士送別韻

黃山白岳向圖中偶見尋嘗叫絕我夢蓮峰歸未得自
笑心同頑鐵猿鶴須知先生無婦不問張儀舌買山錢
少誰追于頓前轍 亦有太白山人老於吳會頗覺家

風別隋苑鶯花原不惡鶴背何妨坐熱賣藥城中爲僑
廡下敢道藏身拙寒梅白處寧殊巖畔積雪

又 題黃大宗小像

少年磊落更蘭亭竹樹烏衣門第却愛顏公家訓好痛
惡梁朝子弟剃面薰衣僱人荅策此輩堪奴隸翩翩公
子翛然身在天際 曾忝座上稱賓狂生老矣減盡從
前慧下筆千言看倚馬老鈍愁遭英銳綠酒論文紅燈
說劍滿腹藏經濟幅巾道服怪君何用輕製

又 題喬石林舍人小像圖中坐擁金釵不類石林所爲

如椽大筆正五花分判二麻專司西掖歸來休沐處閒
暇君王所賜名士科頭佳人醜面葉子南唐戲風流跌

宕看君正出無意 昭明識等兒童閒情一賦何用輕
譏議便擁金釵無不可忠孝不過情字心內原無眼中
憑有况與荒淫異畫家應愛粧成金屋樂事

水調歌頭

沈舟遇大風飲紅橋酒家同華龍眉王
仔園汪叔定季角

不測天公意何苦阻清歡封姨狡獪閒試手段戲晴瀾
身似三眠弱柳且向船中睡倒誰暇整衣冠只有汀沙
上白鷺不愁寒 翻自笑長作客狎江湍酒旗搖處招
我小店坐盤桓回首人間萬事何異風波片刻與客倚
雕闌諸子俱年少衰鬢愧相看

又 贈季端木

百四十餘里四上獨輪車回回定看歌舞爛醉故人家

嘗對汝翁達者頗憶吾鄉前輩康海擅琵琶汝具讀書
眼努力愛年華 賞奇文析疑義靜無諱老人偏荷相
敬此處更堪誇共愛周郎顧曲那識江東年少勲業有
誰加我亦丈夫也章句豈生涯

綺羅香

戲代掃鏡贈李雲田為寶燈夫人新
納侍兒以掃鏡名之

通德相依閒談飛燕頗勝笙歌院落掃地焚香此事儂
猶能作愛貧家壁尚留琴誦詩叟庭惟曬藥更堪誇弟
子環床彭宣豈肯窺簾幕 小家生長纔成念吳中故
土因誰拋却掃鏡敬問先生可怕夫人條約看阿奴他
日榮華忍翔風半生蕭索好留心此後萍踪歸期休更
錯

燭影搖紅

同曹顧菴鄧孝威雷伯顏孫介夫飲正西樵司勳寓園聽雲然女史度曲分韻

得六字

密坐圍爐斜陽已掛梅花屋解歌金縷是秋娘勸盡樽
中綠吏部清狂絕俗興來時全無邊幅佳人知否畢卓
從來酒船千斛 皂帽青衫雲龍那得常相逐歡娛休
使外人聞恐側長安目雅會便同金谷况揚州偎紅倚
玉若詢歸計五日為期亦何妨六

鄧孝威曰竹屋天寒華燈酒密妙依紅袖細寫烏絲此會幾如隔世寧不念司勳發玉塵黃土之悲也

漢宮春

飲瞿生宅月下聽客彈琵琶是陳隋間曲調感而賦之

花月同佳正千金清夜三月揚州主人香醪滿甕且更
淹留四條絃子把陳隋兒女魂勾須側耳

會

拚占盡風流

初似鶯啼燕語忽天荒地老鬼怨神愁

深知工夫不易急處臻幽

白樂天寄李管兒琵琶歌性靈甚好功猶淺急處未得臻

幽開勸君且止對清樽要為身謀君須識江山如此多時

白了人頭

鄧孝威曰四條絃子數語可謂驚魂動魄

木蘭花慢

王生遊豐城載名花數盆歸秦中作此詞贈別

狂夫年少日過北里走章臺問埋劍江濱君寧有意閒
弔張雷好花却如好色道他鄉景物繫情懷佛手柑前
酪酏寶珠茶下徘徊 歸途誰可伴尊壘紅紫漸將開
似范蠡西施五湖船上風月悠哉家人怪君好事向千
山萬水與同回不枉身遊花縣曾逢潘岳多才

瀟湘逢故人慢

謝馮密菴先生惠蘄州簞

蘭溪笛竹竟織作雙文許人獨宿對汝驚心目笑病叟
 支離三間破屋蚤蝨青蠅奈此輩紛紛多欲畧勝似元
 九通州瘴氣來侵肌肉 臥龍鱗鋪薤葉須霧帳銀床
 牙籤玉局閣上人非俗愧詩讓韓才寶分鄭蓄擬報隆
 施美那有明珠清玉請自此永好相期長取木瓜三復
 賀新郎 韓醉自歸自中州大雪後為花燭之夕因賦贈
 夜冷燈光熱恰相宜蠟梅天氣水仙時節欲笑獵場諸
 伴侶歸後薄衾如鐵誰得似少年英發阮瑀陳琳書記
 好更周郎喬妹風流絕名與福君無缺 垂垂一樹香
 非劣到今宵花香有限人香迥別偷覷檀奴應暗喜未
 免小年羞怯暫請為新人代說成就歡娛天有意認夫

明只當窓明雪寒特甚為君設

又

讀紀縠子和閻古古諸律有贈次曹顧菴學士
 龔芝麓宗伯唱和韻

酒肆西風卷憶當年荆高一輩悲來難遣仗劍經過慷
 慨地萬古行人淚泫慙蹙縮身如在繭若問平生曾閱
 歷笑蓬萊海水回頭淺除撰述手難展 先生微語多
 於顯似懷中禁方親授長桑過扁歌罷鬼神聞夜哭驚
 起吹聲羣犬盛名下應酬誰免獨與酒人稱伯仲聽壘
 箎聲不離墳典嶰谷竹伶倫剪

又

壽龔芝麓宗伯

龍虎看舒卷 東坡句 笑留侯終偕此輩君王未遣古栢蒼
 松年最大雨露朝朝光泫經濟手真如甕繭稷契杜陵

徒竊比只當時階級何其淺論樹立屈輪展 懷歸心
事詩中顯愛江南鱸膾旣異規形還扁變理功夫曾不
少雲日其如吠犬水與旱向天求免自古老臣多涕淚
肯庸庸碌碌蒙恩典三徑草漫思剪

又前題

誰慮狂瀾卷看先生回瀾筆力風雷可遣何幸吾猶逢
薊子摩罷銅人涕泫山有竹鷲溪有繭對此但言吾事
濟笑憑愚邀敬多疎淺驥已老足偏展 閒情一賦微
瑕顯怪羣兒以佳爲惡以圓爲扁廣大門庭殊不爾舐
藥能昇雞犬但酒債尋嘗不免賓客紛紛來坐上見朝
回日日衣曾典

又訊龔宗伯病

雲霧逢誰卷或相傳維摩示疾文殊須遣或報先生真
病矣眼望家山常泫門下士簇如筐繭或勸先生歸不
得爲履聲高處恩非淺囑二豎技休展 醫名誰似倉
公顯更何人文章七發賢於和扁但請廢詩如杜甫也
抵補牢看犬公瘦甚吾愁那免老至方爲京雜客正無
門可向書難典髭上雪鏡中剪

又喜汪季角舍人病起

秋霽浮雲卷遇黃花爛開時節客愁堪遣更喜相如無
渴病曾否金莖露泫笑二豎藏形無繭漫向鳳皇池上
去漫畫眉仍慮工夫淺技種種且徐展 機雲兄弟才

名顯記江都宇衡相望熟看門扁燕市重逢情更好豈
為吾能屠犬唱和事先愁不免老日自知才力盡但相
招觴政猶能典話易冗不須剪

又寄兒燕穀儀書

釣罷絲綸卷向塵中如僧取食維摩驅遣為客偶逢寒
夜永秋樹枝頭露泫衾妄想客妻仙繭骨肉尋嘗相聚
少嘆姻緣或是三生淺要代面紙須展陶潛杜甫名
空顯笑當年愚憑儼俟斲徒輪扁自此詩人成定例心
事多憂豚犬寒與餓吾兒那免誦讀但如常守父念平
生積蓄惟圖典勝絲袖費裁剪

又賦北雍石鼓

唐累瓊包卷想元人當時移取駱駝曾遣好古誰如
博士對此清眸雙泫嗔俗字博驚汚繭每讀長歌思敵
手有眉山愁較才深淺况弱步敢輕展千秋方召名
猶顯佐周宣功高勒石非同石扁耆耆天生人共賀闕
虎還曾伐犬用東坡石鼓歌怪寶物秦灾能免嘆息勲名非我
事但員遊空想前王典石鼓文有云君子員獵員獵員遊腸此際痛如
剪

又既預定終制示諸子復作此詞

來去雲舒卷學僧家騰騰任運何勞排遣僧頌云今日騰騰任運明

日任運未死只如霜滿瓦紅日高時未泫陸放翁詩日高未泫晨霜

騰騰白風勁先憐往哲築菴名繭姜總管自築墓舍名市上

消卯酒紅繭菴亦見放翁集

成棺容易買更埋身土不論深淺目縱閉眉猶展
 旌我自羞尊顯但題云詩人處士碑憑窄扁亂世許多
 華屋客弔死惟蠅與犬吾幸矣於茲可免終制他年能
 敬守勝為兒苦要將身典倘忤我紙空剪

又龔半千寄示新詩作此答之

詩體如翁卷

卷字靈舒與友徐璣徐炤趙師秀為詩力追唐調稱永嘉四靈

費工夫專

精五字浮詞盡遣栽藥引泉常自適

徐炤題翁卷山居詩引泉移岸石栽

藥就園蔬

肯學青衫淚滋心所喜採桑繰繭誰與結隣誰入

社除村農寺衲交情淺樵徑外漁帆展

才人多向金

陵顯也難忘吾家舊蹟酒樓殘扁何日買山龍虎地却

共裴生聽犬

用王維山中與裴迪書中意

行路債謝天饒免鼓吹唐

詩憑唱和更誰思天樂教夔典門永閉江休剪

瑞鶴仙

祝無言兄六十

看君頭最黑笑陸展染髮難逢側室稱觴多上客是商
 山四皓竹溪六逸壽星南極去海邊蓬萊咫尺其傳言
 隋苑瓊花長見神仙踪跡須識平生心性惟愛詩篇
 不求官職逢人索句老至依然汲汲怪玄暉妙詠逢江
 祐輩此事定非所急論世間誰似吾兄把詩過日

風流子

題無言兄半瓢

壺公吾所羨一壺耳中有小蓬萊看深樹鷓鴣一枝可
 寄荒原狡兔三窟堪哀客須識半瓢名屋者其意最詼
 諧丈室維摩儘堪說法小園庾信尚未忘懷與君多

閱歷驚心甚已是暮景相催安得長依小築永伴樽罍
况王謝烏衣劉郎感慨洛陽禾黍沈約徘徊滿目傷心
如此忍踏塵埃

滿庭芳 題龔節孫小像

蘭陵龔節孫移家陽羨將學東坡老子買田築園
種柑橘三百本作一亭名之曰楚頌豫爲此圖

瀟灑宗之論年相似如何慕屈懷蘇買田陽羨種橘課
奚奴恥學荊州計利憐秋色要滿園廬真高興亭名楚
頌行樂預爲圖 非迂山水地絃歌之外足辦吳租問
霜前三百肯寄狂夫說甚三王法度只佳味可口爭須
莊子三王五帝之禮義法度譬諸
楸梨橘柚其味相反而皆可於口京塵裏爲君題像回
首憶江湖

又 食葡萄有感

馬乳經霜龍鱗含潤西風塞雁飛來忽思當日漢使大
宛回更有將軍廣利功成後獻種蓬萊千秋下吾徒坐
饗老死守書齋 堪哈憑一斗涼州可得奈汝何哉
榮華無益誤我樽 曷請學晉中方法收干斛釀作春醅
留佳客高陽一董談笑任詼諧

水龍吟 巳未春日遇舊江都明府駱龍媒于長安
方候補選命予爲題小像 圖中跌坐洞

庭石上遶石
細草初綠

科頭箕踞伊誰相逢記在蕪城裏甘棠一樹到今無恙
公會憇此長安道上重瞻丰度光陰彈指又春風吹入
萋萋芳草畫中景依稀是 欲問高懷清節但蕭然飲

泉而已賦詩初就讀書微倦石頭堪喜無數蒼生須煩
救濟牛刀再試想名流自有阜財佳政且彈琴耳

過秦樓

題陳其年小像像作翫管填詞狀一雙鬢吹簫度曲其旁

使爾填詞何人草檄此最不平之事鬚長似戟筆快如
風故作麻姑狡獪也覺流宕無聊且對蛾眉消人愁思
况方回近日斷腸佳句是兒能記

宋詩能道江南斷腸句只今惟有賀方回

看從此宮禁聞名新成樂府便付神仙行綴紅雲捧

處紫袖垂時召賦蓬萊祥瑞天上聞歌歸來舊日秦娥

巧相嘲戲願卿如紅杏尙書情重寒天半臂

醉蓬萊

被徵入長安重遇王茂衍副使有贈

憶初瞻丰度黃鶴樓中唾成珠玉一見論文便千秋袖

勗判袂多年滿眼烽燧想甘棠猶綠豈料長安

舊細談心曲 遭遇崇文 天子最愛司馬凌雲飄然

絕俗若問詞臣卽當時岳牧四海瘡痍總入篇什勝風

雲累牘僕本農夫且歸田里逍遙鼓腹

法曲獻仙音

壽秦補念運使

舊日金閨新來鹽鐵誰似文章經濟欲問張融初成海
賦數句曾增還未看平日多才思和羹誰可繼君無愧

况天津雄關重地論山海說甚齊桓劉渙莫道理財

人便同他咸陽心計

漢武帝時有東郭咸陽願募民因官器作鹽

生甫生申

也須識皇天有意想今朝宴客不止水晶一味

